

Dithero tsa Tirelano mo Kutlwanong

16/2015 Thero ka Sontaga e e bidiwang Remiskere, e le ka 01. 03. 2015

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno, letsatsi le, le kwadilwe mo go Baroma 5:8, le re:

"Modimo o supile lorato lo o re ratang ka lona, ka Keresete, a re swetse, re ntse re le baleofi."

1. Sefela sa 349 - 317/326

2. Thapelo: Modimo, Morena, Rraetsho ka Keresete yo e leng Modimo ruri le motho ruri, re a go leboga, ka o re neile boroko mo bosigong jo bo fetileng. Ke gona re kopang gore le mo letsatsing la kajeno o re abele Mowa o o Boitshepo wa gago gore o re goge ka go re sedimosetsa mo tseleng e re tsamayang ka yona. O re dire gore re nne badiri ba ba ikanyegang mo tshimong ya gago ya moweine, re tlhokomele tshimo ya gago ya moweine, re le batlhokomedi tota, ba ba e tlhagolang sentle, ba ba e lemanang sentle. A o ko o re thuse jalo, Modimo, ka ene Morwao yo o rategang Jesu Keresete yo o busang, a phela mmogo le wena Modimo Rara, le Mowa o o Boitshepo, jaanong le ka gale, le ka bosakhutleng. Amen.

3. Lefoko la Testamente e kgologolo le kwadilwe mo go Jesaya 5:1-7;

Epistolo ka fa thulaganyong ya 2 e kwadilwe mo go Baroma 5:1-11;

Efangele ka fa thulaganyong ya 3 e kwadilwe mo go Matheo 12:38-42.

4. A go ipolelwe tumelo ya bokeresete!

5. Sefela sa 269 - 251/260

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 12:1-12, e re: "Ke fa (Jesu) a simolola go bua nabo ka dipapiso a re: 'Motho o ne a dira tshimo ya moweine, a e agelela ka logora, a epa setlhotlhelo sa weine, a aga serala, a e neela barapi, a eta. Ka

nako ya teng a roma motlhanka kwa baraping gore a amogele kabelo ya gagwe ya maungo a tshimo ya moweine mo go bone. Mme ba mo tshwara, ba mmetsa, ba mo koba a se na sepe. A bowa a roma motlhanka yo mongwe kwa go bone; le ene ba mo ntsha dintho mo tlhogong, ba mo dira tse di tlabisang ditlhong. Jaanong a roma yo mongwe, mme ene ba mmolaya; le ba bangwe ba le bantsi; ba bangwe ba ba betsa, ba bangwe ba ba bolaya. O ne a sa na le a le mongwe, morwawe yo o rategang, a mo roma kwa go bona e le wa bofelo, a re: 'Ka e le morwaake, ba tla mo tlotla.' Mme balemi bao ba rayana ba re: 'Yo ke moja-boswa; tlayang, re mmolaeng, boswa e tle e nne jwa rona.' Ba be ba mo tshwara, ba mmolaya, ba mo latlhela kwa ntle ga tshimo ya moweine. Jaanong, morena wa tshimo o tla dirang? O tla tla, a bolaya balemi, tshimo ya moweine o tla e neela ba sele. A ga lo a buisa Lokwalo lo lo reng: 'Lentswe le baagi ba le latlhileng ke lone le le dirilweng letlapa la sekhutlo; seo se dirilwe ke Morena, se bile se gakgamatsa mo matlhong a rona?' Foo ba batla go mo tshwara; gonne ba ne ba lemoga, fa a buile setshwantsho se ka ga bona; mme ba boifa batho, ba be ba mo tlogela, ba tsamaya." Amen.

8. Thero: A bopelotlhomogi le kagiso tse di tswang mo Modimong Rara le mo Moreneng wa rona Jesu Keresete di nne le lona. Amen.

Ditsala mo Moreneng, Lefoko la thero ya kajeno le re ruta ka ga thulaganyo ya go kgolagana fa gare ga batho ba ba rekisetsanyang, ke raya beng le bahiri gongwe bathapi. Morena wa tshimo e ntle ya moweine, o ne a e jala sentle, a e agelela ka logora, a epa setlhotlhelo sa weine, a aga serala, a epa dielo tsa go nosetsa ditlhare tsa moweine sentle, ditlhare tsa moweine tsa tshimo eo ya moweine tsa supa bontle, tsa ungwa maungo a a monate, a dira gore bathapi, bahiri ba gogege, ba dumalane le morena go thapa, gongwe go hira tshimo eo ya moweine. Ga dirafala go ya mo nakong e ba dumalanang ka yona ka kgolagano ya bone. Le tshimo ya moweine e ne ya tlhokomelwa sentle.

Re utlwa gore tshimo eo ya moweine ya agelelwa logora sentle ka lorako lo lo tiileng gore go se tsene, le fa e le sebata sepe, le e seng phologolo epe e e ka senyang teng. Tota-tota tshimo eo ya moweine e ne e femetswe sentle, ya tlhokomelwa sentle, ditlhare tsa moweine tsa mela sentle, tsa tlhongwa sentle. E ne e le tshimo ya moweine e e ratilweng thata ke morena wa yona. Gape mo tshimong eo ya moweine ga epiwa setlhotlhelo sa weine ka botswerere le kitso e kgolo. Setlhotlhelo seo sa weine sa agiwa ka tsela ya Bajuta gore ba ba neng ba tlhotlhela maungo a moweine ba kgone go dira tiro ya

bone sentle, go se nne ope yo o ipatang ka setlhotlhelo sa weine, mme tiro e dirwe sentle. Ee, e ne e le setlhotlhelo sa weine tota.

Ga ba ga agiwa serala, sa agiwa, se le godimo tota gore balebi le badisa ba tshimo ya moweine ba kgone go bona mo dintlheng tsotlhe tsa tshimo ya moweine, ba se ka ba tshoganyediwa ka kgorogo ya magodu, badisa ba a bone a ntse a le kgakala. Gongwe fa go ka tla sebatana se se rileng, modisa yo o mo seraleng a se bone ka pejana, gongwe molelo, fa o ka nna teng, a o bone ka pele. Tsotlhe tsa tshimo eo ya moweine di ne di rulagantswe sentle, di baakantswe sentle. Morena wa yona a baakanya tsotlhe, go ne go se na sepe se se tlokegileng. Ke gore Modimo o tlhodile lefatshe, a le fitlhela gore tsotlhe di ne di le molemo thata. Fela jalo ka go itlhaolela Baiseraele go nna morafe wa ona, le go rulaganya tsotlhe mo morafeng oo. Le kereke ya kgolagano e ntšhwa e agilwe ke Keresete ka fa thatong ya ga Rraagwe.

Ya re morena wa yona a itumedisiwa gore tsotlhe di siame, a e thapisa mo bahiring, mo bathaping, a solofela gore ba tla itumedisediwa ke tshimo eo ya moweine. Le balemi, gongwe bahiri ba tshimo ya moweine eo ba dirile tiro ya bone ka tsela e e itumedisang, ba e lema, ba e nosetsa, ba e tlhokomela, go ya ba bona maungo a le mantsi a a monate a a itumedisang.

Morena wa tshimo ya moweine o ne a ya mo lefatsheng le lengwe. Ga re bolelelwe gore o ne a ya mo lefatsheng lefe, mme ya re a le koo, ga tla sebaka sa gore balemi le bahiri le bathapi ba ntshe maungo a moweine a a tshwanetseng mong wa yona, ba dire ka fa kgolaganong le ka fa tumalanong ya bone, go ka nna matute a leungo la moweine, a dithetlha tsa mofine, gongwe bojalwa jwa mofine jo e leng jona, jo bo feleletseng; a roma batlhanka ba gagwe, o ka re ditlhopho tse tharo.

Ba ntlha ba ba tshwara, ba ba betsa, ba ba koba ba se na sepe. Ba bobedi ba ba ntsha dintho mo tlhogong, ba ba dira tse di tlabisang ditlhong. Ba boraro ba ba bolaya, le ba bangwe ba le bantsi; ba bangwe ba ba betsa, ba bangwe ba ba bolaya. Bosula joo bo dirilwe ke balemi ba ba neng ba hira, ba thapa tshimo ya moweine. Morena wa tshimo ya moweine a bowa a roma batlhanka ka go latelana, ba ba direla, jaaka ba diretse ba ntlha, ba ba betsa, ba ba bolaya, ba ba kgobotletsa ka majwe, jaaka go kwadilwe mo go, jaaka go kwadilwe mo go Math. 23:37 gore "Jerusalema, Jerusalema yo o bolayang baporofeti, o

kgobotletse ba ba romilweng go wena! Ke ratile gantsi jang go phutha bana ba gago, fela jaaka kgogo e tle e phuthe dikgogwana tsa rona ka fa tlase ga diphuka, mme lo ganne!"

Mo bofelong morena wa tshimo ya moweine a re: Go botoka gore a rome morwawe yo o tsetsweng a le esi, morua boswa gore a ye a na le moriti yo mogolwana wa ga Rraagwe, a ye a batle tsa ga Rraagwe, a batle tsa gagwe. Ba ne ba sa tlotle, mme ba galefela ruri, ba bua ba le bosii, ba rayana, ba re: "Yo ke moja-boswa; tlayang, re mmolaeng, boswa e tle e nne jwa rona." "Ba be ba mo tshwara, ba mmolaya, ba mo latlhela kwa ntle ga tshimo ya moweine." Mong wa tshimo ya moweine a galefa, a galefela balemi ba ba neng ba hirile tshimo ya moweine, a tla, a bolaya balemi, tshimo ya moweine a e tsaya, a e neela ba sele, jaaka Bajuta ba amogilwe bogosi mo pusong ya Modimo, o ka re: Bo mo diatleng tsa baeteledi pele mo kerekeng ba ba tlhaoletsweng mo go baditšhaba.

Puso ya Modimo ya neelwa ba merafe e mengwe ba ba neng ba sa tshwanelwa ke go e bona. Jesu a re: "Ga go a tshwanela go tsaya senkgwe sa bana go se latlhela dintšwanyana." Mosadi wa Mokanana a fetola, a re: "Ee, Morena, gonne le tsona dintšwanyana di a tle di je matlhotlhora a a wang mo tafoleng ya beng ba tsona." Modimo ke Morena wa tshimo ya moweine. Balemi ba ba neng ba hirile tshimo ya moweine ke rona bana le batho ba gagwe.

Batlhanka ke baporofeti ba ba neng ba romelwa mo morafeng wa Iseraele, le bareri ba Lefoko. Moja-boswa ke Morwa Modimo, Morena wa rona Jesu fela. Morena a re: "Itumeleng lo ipele; gonne tuelo ya lona e kgolo kwa magodimong. Gonne ba bogisitse baporofeti jalo, ba ba neng ba le teng pele ga lona." "Lentswe le baagi ba le latlhileng ke lone le le dirilweng letlapa la sekhutlo; seo se dirilwe ke Morena, se bile se gakgamatsa mo matlhong a rona." Bana ba Iseraele ba ne ba sa tlhaloganye gore Morena Jesu ke Mesia, Morwa Modimo ka boene, Moja-boswa wa boswa jwa Morena wa mo legodimong, Ngwana yo o tsetsweng a le esi ke Rara ka bosenang-tshimologo, pele ga dipaka tsotlhe, e le lentswe la sekhutlo, le go kopanngwang kago yotlhe ya kereke ya ga Keresete ka lona.

Bajuta ba le bantsi ba ne ba lemoga morago ga loso lwa Morena, gonne tota Modimo o ba senoletse ka go bapolelwa mo sefapaanong gore Jesu wa Nasaretha ke Morwa Modimo, bogolo ka tsogo ya gagwe. Ke fa go reretswe batho ka letsatsi la Pentekoste gore: "Jaanong a lelapa lengwe le lengwe la Iseraele le itse ruri gore ene Jesu yo lo mmapotseng, Modimo o mo dirile Morena le Keresete." Le mo nakong ya loso lwa Morena

mo sefapaanong molaodi-wa-lekgolo yo o neng a eme fa teng a lebaganye nae, a kua, a re: "Ammaaruri, motho yo e ne e le Morwa Modimo; ruri, motho yo e ne e le mosiami!"

Ya re Morena a sena go tsoga mo baswing, barutwa ba gagwe ba laotswe ka fa thatong ya Modimo Rara ka taolo e kgolo ya ga Jesu e e reng: "Thata yotlhe ke e neilwe kwa legodimong le mo lefatsheng. Ka moo he, yaang lo dire merafe yotlhe barutwa ka go ba kolobetsa mo leineng la Rara le la Morwa le la Mowa o o Boitshepo, le ka go ba ruta go tlhokomela tsotlhe tse ke di lo laetseng. Mme itseng, nna ke na le lona ka malatsi otlhe go ya bokhutlong jwa lefatshe." Ke gona re bonang ba merafe e le mentsi ba ineetse mo Moreneng, kajeno re Batswana, le Masulu, le Majeremane, le Maindia, le Maburu, le Maesimane, le ba bangwe, re ba ditšhaba. Le fa re le ba merafe e e farologanyeng, re bana ba Modimo ka go dumela mo go Jesu Keresete, ka go kolobediwa mo leineng la gagwe, ka go ja mmele wa gagwe, le ka go nwa madi a gagwe gore re itshwarelwe maleo ka ntlha ya ga Jesu Keresete, Mopholosi wa rona. Amen.

9. Thapelo: Morena, Modimo wa rona ka Jesu Keresete yo e leng Modimo ruri, le motho ruri, yo o fentseng, wa tlosa boikgethololo jwa merafe ka loso le tsogo ya ga Morwao Jesu Keresete. Wa re tlišetsa lorato le go direlana fa gare ga merafe e e farologanyeng mo kerekeng ya gago. Kajeno re batho le batlhanka ba gago mo phuthegong ya gago. A o ko o re thuse gore re direlane ka go tšweledisa puso ya gago mmogo ka Efangele ya gago ka ene Jesu Keresete, Morena wa rona. Amen. Thapelo ya Morena: Rara wa rona yo o mo legodimong ...

10. Sefela sa 267 - 249/258

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke Jafta Rrabontsi Lenkwe + ka ngwaga wa 1994, la rongwe le ka 2003/2009 Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.